



THE
WAYFINDER
出外靠朋友

Where are Hongkongers?

2020 港人嘍邊度 2021

港僑會喺2021年5月至6月期間就住《國安法》實施一年後，移民港人到埗英國後選擇落腳嘅城市訪問咗720位居英港人。調查目的除咗為未來即將要移民嘅香港人提供地方資訊之外，港僑會亦都會就住調查結果向英國政府同地方議會提出方案，希望當局會為英國社區嘅香港人提供更精準嘅資源規劃。

報告除咗反映英國邊一個城市比較多香港人定居之外，同埋香港家長會偏向喺邊個校網地區幫小朋友搵學校。以下係普遍移民香港人首先定居英國嘅地區...

各地熱門之選

英格蘭 (London外) (70.6%)

1. Manchester 12.6%
2. Birmingham 7.4%
3. Reading 6.5%
4. Bristol 6.1%
5. Nottingham 4.9%
6. Oxfordshire 4.7%
7. Surrey 3.7%
8. Warrington 3.1%
9. Leeds 2.6%
10. Kent 2.5%

蘇格蘭 (3.8%)

1. Edinburgh 33.3%
2. Glasgow 27%
3. Aberdeen 10%

威爾斯 (1.5%)

1. Swansea 35.3%
2. Cardiff 17.6%
3. Newport 10.3%

北愛爾蘭 (0.7%)

1. Belfast 30%
2. Antrim and Newtonabbey 14%
3. Ards and North Down 10%


詳程可以參考港僑會嘅調查報告。





自LOTR同地BNO visa嘅出現，英國各城市陸續都出現好多香港人嘅面孔，意味住移民英國嘅路途上，您絕對唔係孤單一人。

相信對於唔太熟悉英國各城市嘅香港人，喺邊個城市落腳都係問題之一。根據以上港僑會嘅「港人移英熱門地點分析報告」，香港人會因為工作機會而揀喺Greater London定居同發展，當然咁大個國家選擇就唔係得一個，離開大城市亦都可能適合您。以下我哋好高興訪問到分別住喺Nottinghamshire、Birmingham、Swanseas同埋Essex嘅香港人，睇吓佢哋揀住喺大城市外嘅原因同埋喺英國生活又有咩貼士。



Ingatestone

受訪者：Page
居英50年

Page 喺70年代就跟屋企人一齊移民過嚟英國，先後因為工作原因嚟Central London同Essex入面幾個城市都住過，最後就揀左啱Ingatestone附近定居落嚟。Ingatestone介乎於Greater London同Essex 2個郡之間，所以要入Central London都好快，火車轉地鐵大概係1個鐘到。Ingatestone呢面多數都係住house同flat，2至3房單位樓價大概係40萬英磅，1房嘅單位就大概係25萬英磅。佢覺得住緊嘅呢但比較適合一家大細或者退休人士嚟住。



石像：Ingatestone 同 London距離23哩，
Ingatestone 同 Chelmsford距離6哩。

地區 / 環境：

如果大家想知多啲當區嘅治安同埋罪案率其實可以上police.uk同埋adt.co.uk 搵返自己嚟區。以下呢幾個區我想向大家推介：

1. Ingatestone:

一個村莊，比較靜同埋相對地闊，但係好悠閒，出入London做嘢都會方便啲。

2. Chelmsford:

一個相對大嘅城市，市中心比較大同埋都會比較多工作機會。

要小心嘅地區有：

1. Dagenham & Barking (Greater London):

雖然樓價好平但係呢區好雜，呢度成日有人打交、搶嘢同埋爆竊。

2. Basildon (Essex):

呢區好多Council Houses，住嘅人都係比較雜嘞，同埋啲學校亦都好差！

關於升學：

佢覺得呢面通常係天主教嘅學校校風都會好啲，如果家庭本身已經係教徒不妨可以去當區嘅教會聯誼下，亦都可以請教會入面嘅神父做推薦人，更加容易入到天主教嘅學校。

另外Essex呢面都有幾間唔錯嘅Grammar School（政府經營嘅名校，專門俾小學成績好好嘅學生讀），例如Colchester County High School for Girls 係一間英國排名數一數二嘅Grammar School。想考入去就要先考11+ Exam（Grammar School嘅入學試），通常家長可以畀小朋友8、9歲嘅時候可以幫佢地搵定專門教11+ Exam嘅補習老師，Gumtree.com 就有好多唔同嘅選擇。

入鄉隨俗：

盡量互相尊重，同埋融入呢度嘅文化，比一個好嘅印象英國人。當然係呢到人生路不熟都要警覺性高啲，小心俾人呢。

例如呢區始終係一個村落，入面有時都會有馬車行，如果撞車時前面有馬車千祈唔好有預警咁超車，因為咁樣會嚇到隻馬，好容易出意外。

又例如買屋嘅時候要留意層樓係唔係grade 1/2 listed（歷史建築），如果係嘅話話間屋唔可以亂咁改裝，如果唔係會要罰錢。



過來人嘅貼士

香港人嚟到威爾斯盡量試下放低小小香港有嘅生活習慣，融入社區同呢度嘅人接觸，甚至可以學吓威爾斯語同本地人傾吓計互相交流下文化。大家可以睇呢到 www.fancharity.org 搵下一啲peer group或者興趣班同多啲當地人傾計，我覺得呢個係一個好好機會去練下英文溝通能力，好多時英文口音真係唔係問題，最緊要係肯試吓講同埋凡事虛心學習同埋有禮貌，當地人都會有耐性教你。



Mansfield

受訪者：Andy
一家三口居英7個月

Andy一到埗已經睇Nottinghamshire 買屋，但因為當時仲未交樓所以睇Stafford同Derby租Air bnb住過一排，順便了解吓當區環境。揀Nottingham落腳係因為佢比較嚮往自然生態環境嘅生活，區內附近有森林、郊野公園，空氣好清新！



生活：

Nottingham嘅市中心會比較多華人超級市場、唐餐館同埋附近嘅小鎮都有好多大型超市，非常方便。區內最近都多咗好多香港人，我住緊嗰到都識咗幾個香港嚟嘅鄰居。住喺區內可以搭電車代步，但因為我住喺Mansfield所以搵車嘅都大概要20分鐘。如果想知更多呢區嘅嘢，建議可以上當區Council嘅官方網站了解。

校網：

Nottinghamshire係一個校網比較大同Outstanding學校相對地多嘅區，考慮到仔仔嘅學業，我地想搵間Outstanding 嘅State School。如果想知區內學校嘅評級可以睇<https://www.gov.uk/school-performance-tables> 查詢，評級係由校內學生成績而定。因為英國有得跨區揀學校，所以搵地方落腳要考慮埋當區校網！

工作機會：

呢區有幾個大型warehouses長期都會有招聘唔同部門嘅職位，如果未搵到心儀嘅工作可以做住先。有好多其他歐洲國家嘅移民都睇warehouse 工作，而英語水平同埋工作效率都係我哋嘅優勢，只要肯放下身段，當騎牛搵馬儲吓工作經驗，睇英國搵工絕對唔難。

當然Nottingham都有一個好似中環咁嘅down town，白領人士都有工作機會；如果想創業嘅話其實呢面都幾流行加盟店嘅生意，變相有公司俾你嘅資源同埋數據咁就唔需要由零做起。

England

英格蘭



過來人嘅貼士

我嘅建議係買樓千祈唔好隔山買牛，一定要做足功課，尤其睇英國買樓過程比香港複雜，所以唔好懶同心急。移民心態上建議香港人唔好自我封閉，多啲主動參與社區活動、同本地人多接觸、溝通。出去返工、返學可以更容易融入英國生活。同埋盡量唔好帶住香港嘅生活習慣過嚟，虛心學習本地人嘅文化、處事方式、尊重唔同階層同種族、奉公守法，貢獻社會，令到本地人都知道香港人嘅質素！



Birmingham

受訪者：Randi
居英10年以上

Wendy 10年前因為小朋友嚟Birmingham讀書嘅關係就一直嚟度住咗10年以上。Birmingham係全英國第二大嘅城市，呢到聚集咗好多唔同文化同宗教背景嘅人，亦都有好多次回教寺。近年呢到都逐漸變成一個商業化嘅地區，打造一個金融中心，幾年前HSBC總行都搬咗上嚟，變相呢到就多咗好多生活配套又多咗就業機會。



生活：

我之前往咗Merry Hill附近，出返市中心搵車都要差唔多半個鐘，呢區白人比較多，就比較靜。Birmingham City University附近有好多新嘅樓盤同商店，繁榮到好似第二個City Centre咁。China Town最近就開咗好多唔同嘅中式食肆、珍珠奶茶舖同埋華人超級市場，附近本來亦都有一個大型室內街市同埋其他印巴超級市場，有時睇嚟到買菜平過中超好多。同埋咗附近嘅B5地區拆左個Wholesale Market，開始起緊好多flat同apartment，香港人都可以睇下呢區嘅樓盤，因為都好方便。

房屋：

呢面嘅住宅區大多數係以Semi-detached house為主，就算有Apartment都只係得三層，之前住過嘅2房單位樓價大概係20萬英磅有找；宜家咗City Centre住一個2房單位要差唔多23萬磅。如果想搵近市中心嘅Studio flat或者係一房單位嘅租盤大概係650-700英磅，2房就1000-1200英磅到。

England

英格蘭

工作機會：

呢到比較多銀行同埋金融工種，NHS同埋學校都需要人。其實如果香港人唔介意轉行做勞動工種，呢度嘅超級市場同埋商店都長期需要請倉務或者售貨員。如果英文溝通能力好其實可以試下做售貨員，人工都幾好。以我朋友咗Chanel做Sales為例，最主要sell中國客同埋留學生，佢一個月扣稅後嘅人工都有3000英磅到。

校網：

確定睇邊區住之前，首先email問咗嗰區嘅學校有冇位，如果唔係到時搬到去睇到另一個區咗嘅學校，係唔可以跨區升學，但都可以睇Local Council申請等佢派學校。如果就小朋友嚟讀中、小學嘅我會推介以下呢幾個地區：Selly Oak, Edgbaston, Harborne, Sutton Coldfield, Bourneville

過來人嘅貼士

推介嘅地區：


Selly Oak同Edgbaston
相對地會近市中心，大概係15-20分鐘車程，呢2個區嘅樓價唔算太高，所以都有好多華人係呢到住。
要小心嘅地區：Soho同Handsworth
呢啲地區都比較多印巴人士多，睇落會比較雜同亂嘞，治安亦都麻麻地。



Swansea

受訪者：Freddie
居英3年

Freddie因為5年前嚟Swansea讀Master，之後為左工作選擇一個人移民過嚟Swansea定居。如果要一個香港地方去形容Swansea會係西貢，因為佢係一個沿海嘅城市，有小小新市鎮嘅感覺亦都有好多綠化空間，係一個好悠閒嘅地方。閒時我都鍾意沿着海邊由市中心行去The Mumble，沿途都有幾多公園值得行吓，例如Clyde Garden、Singleton Park都唔錯。



Welsh Breakfast 同English Breakfast嘅配菜唔同，
例如Crockles（好似蠔仔咁）同Laverbread（海藻）。

住屋：

呢到嘅一房單位嚟Swansea市中心大概租金係600英磅樓下一個月，要睇吓合約有冇包bills同Wi-Fi；如果唔介意租Share house嘅話價錢大概400幾英磅一個月，不過Share house就要同人share廚房、客廳、廁所，所以都可能有風險遇到一啲好差嘅屋主。如果係自己一個嚟嘅年青人又唔介意住Share room，以下呢幾個地點可以睇下：

Uplands同Brymill冇好多唔錯嘅Share house，嚟到相對地會多啲大學生租；The Strand有一個好大嘅Student Accommodation building，如果係學生嘅話可以租St. Davids；Marina就會比較多華人學生租住，亦都好近海邊。

如果想揀比較好嘅地區，可以睇吓Sketty、Killay(Uplands)同埋The Mumbles (Post Code: SA3)，佢地相對地比較係有錢嘅地方。有小朋友嘅家庭可以考慮吓Sketty呢個地方，因為佢嘅校網好，附近有一間全威爾斯頭排幾名嘅中小學——Olechfa School。

當然咁大個城市都冇一啲冇咁好嘅地區，我唔會太建議香港人揀咗Mayhill、Townhill同埋Mount Pleasant等地方定居，呢啲地方都係治安冇咁好嘅地方。呢幾個地區起咗好多Council House(公屋)，人流比較複雜，住嘅人大多數都係低下階層或者係拎緊統一福利金俾市政府安排入去住。而正正因為呢度品流複雜，經常發生劫案，治安問題嚴重，嗰區樓價都相對地低，所以千祈唔好俾佢嘅價錢吸引到而揀咗呢區定居。

Wales

威爾斯

工作機會：

可能因為英國脫歐之後勞動階層少咗批歐洲人去做，所以變相市場對藍領工作嘅需求比較大，例如做工程或者倉務都好快就搵到工！另外威爾斯政府有推出學徒計劃，過程中僱主會提供唔同嘅藍領工作機會，例如水電工、工程助理，完成咗個課程仲會比到一個資歷架構二或者三級證書，當然呢個計劃都有年齡限制，如果唔怕轉行嘅香港人其實可以學返門技能旁身。如果想留意吓有咩學徒計劃招聘緊人，可以去Careers Wales, <https://careerswales.gov.wales/> 輸入返地址或者Post code就會有搵到附近提供培訓嘅僱主。另外當然大家都可以呢個網站搵到一啲求職資訊，例如履歷表同埋求職信嘅格式，符合返呢面搵工嘅要求。

其實好睇移民過嚟嘅香港人搵工嘅態度開唔開放，可能要有心理準備做返老本行或者要由頭爬起，但係我覺得可以搵到咩工都試吓做住先，喺嗰度建立多啲人際關係，到時想轉工都有人可以幫你做referee。

華人社區：

如果講可以買到亞洲食品、日用品嘅地方可以去 Sandfields一帶 同埋 St. Helen's Road到Bryn-y-mor Road，嗰度都有唔少商店同食肆係亞洲人同埋以前移民過嚟嘅香港人開嘅嘅。呢到以前有一個機構叫做史雲斯華人社區互助中心已經睇度差唔多20年，後來由威爾斯華人協會接手，佢地係區內主要為華人提供專業服務，佢地都會提供到廣東話同國語嘅服務，方便英文冇咁好嘅華人去搵佢哋幫手。

過來人嘅貼士

香港人嚟到威爾斯盡量試下放低小小香港嘅生活習慣，融入社區同呢度嘅人接觸，甚至可以學吓威爾斯語同本地人互相交流下文化。大家可以睇呢到 www.fancharity.org 搵下一啲peer group或者興趣班同多啲當地人傾計，我覺得呢個係一個好好機會去練下英文溝通能力，好多時英文口音真係唔係問題，最緊要你肯試吓講同埋凡事虛心學習同埋有禮貌，當地人都會有耐性教你。



HONG KONG LINK UP 香港連隣

香港連隣是一個非營利組織，旨在將英國居民與抵英的香港人聯繫起來。我們正在推行夥伴計劃 – 當你到臨英國，我們會為你安排當地人作為你們新生活上的夥伴，為你解答生活上的諮詢，以及文化上的交流。這些夥伴亦樂意為你提供人際圈的連結。我們期望夥伴之間能夠建立長遠的友誼，以及夥伴之間在情緒上能夠互相支撐，以令港人在英國能進入最順利的適應。



英國人又點睇香港人？

受訪者：Nick Woods
HK Link Up 本地義工

Nick係一個住喺Portsmouth嘅Hong Kong Link Up本地義工，但曾經透過Hong Kong Link Up嘅Buddy Scheme幫助過一個以LOTR身份移民嘅單親家庭喺當地安頓好生活。
佢對於香港人移民英國嘅消息相當了解，亦都表示好歡迎香港人加入英國呢個文化多元化嘅國家！

以下內容取自編輯同Nick嘅訪問，內容會翻譯成廣東話方便大家理解。

Nick後生嗰陣隔離屋有一個嚟自香港嘅家庭，因為大家左鄰右里嘅關係經常有交流，所以佢對香港人有一個好好嘅印象，亦都對香港呢個地方多咗認識。
「住喺隔離嘅香港家庭喺同一條街開咗一間唐餐館，佢哋經常會請我哋試食唔同嘅港式餸菜，對於我來講係一個好好嘅回憶，我亦都覺得香港人好好客、對我哋外國人都特別親切。因為呢一個家庭令我對香港呢個地方多咗認識，其實睇到香港而家咁樣我個心都唔安樂，我明白根據中英聯合聲明香港係九七年會回歸中國，但係睇到而家香港嘅社會狀況漸漸變得越嚟越差，我就覺得好似英國遺棄左香港咁樣。」

加入
HK Link Up
做義工

成為朋友

喺2020年10月Nick幫過一個喺Portsmouth落腳嘅單親家庭。當Nick知道呢個家庭原來從來未嚟過英國，除咗提醒佢哋初嚟報到要申請嘅嘢之外，佢好希望藉住介紹自己嘅屋企人同佢哋一家聯誼去令佢哋容易啲融入英國文化、生活，所以係春天嘅時候佢哋兩家人約咗喺沙灘附近一齊野餐、互相交流，之後亦都有一齊約過去玩Pedal boarding。

香港人喺英國嘅日常溝通


Nick覺得香港人唔需要太擔心言語上溝通唔到，就好似呢個家庭為例雖然Nick覺得佢哋嘅英文溝通有問題，但媽媽就對自己嘅英文有乜信心，Nick覺得最緊要係有心肯講肯學，好多人都願意幫手。如果真係基本溝通都未得嘅，可以試下去Council搵一啲免費嘅英語班，但基本上學得最快都係同英國人多啲溝通，多啲交流自然就會識得講。

香港移民潮
英國人嘅負擔？

「我從來唔會咁樣諗，歷史嚟講，至80年代起英國本土已經有一個好大嘅華人圈子，佢哋可以喺呢個國家建立到自己嘅網絡、開餐館甚至係大型嘅超級市場已經證明佢哋有能力係呢個國家自給自足；我都相信接住黎嘅香港人都係一個對國家重要嘅勞動力，同時亦都可以刺激國家嘅經濟。我成日覺得香港人好勤力同埋喺工作上好快就上手，相信呢度有好多工種佢哋都適合做。」

“

I think it's a different type of immigration.
The Hongkongers seem ready to work, built
for themselves rather than wanting stuffs
(from the country).



星月同行

一對一友伴配對服務

「出外靠朋友」，但不是每個移居外地的港人，都有朋友在外。

由幾個熱心香港人於2021年6月在英國註冊成立，HKG International 旨在連結同路香港人，透過推出「星月同行」海外港人友伴計劃，提供一對一配對服務，希望促進港人的互助精神。

計劃將招募移居英國超過四個月港人充當嚮導及友伴（簡稱「月亮」），為準備移居或初到埗同區的港人（簡稱「星星」），提供為期三個月之支援，助「星星」更快適應當地生活、建立社交圈子。「星星」需承諾在抵英四個月後成為「月亮」，幫助下一批港人，延續守望相助的精神，並一步步凝聚港人力量。



「我覺得香港人如果有嚟過英國嘅話都唔會太難熟悉呢邊嘅生活，最緊要係喺呢度建立一個網絡，識多幾個人起碼大家都有個照應，呢個亦係其中一個我搞星月同行嘅原因。」

受訪者：Ivan Yip
星月同行創辦人之一

星月同行呢個計劃旨在配對即將要嚟英國嘅香港人同已經過咗嚟英國定居嘅香港人，希望透過配對香港人可以係英國互相幫助，幫佢哋盡快適應呢度嘅生活。過咗嚟英國一年嘅Ivan係星月同行嘅創辦人之一，原來喺佢籌備星月同行時就已經有幫過香港家庭嚟英國定居嘅經驗，而呢啲經歷亦都啟發到佢去成立星月同行嘅計劃，佢希望可以鼓勵其他在英港人去幫助更多有需要嘅香港人。



Chester到 Birmingham 安定一個啱啱到 埗嘅家庭

第一次幫手係係我仲未搞星月同行之前，朋友介紹咗一個即將會以BNO Visa過嚟英國嘅單親家庭，因為佢地喺英國冇識嘅人，到埗後想搵個照應。喺佢地未嚟之前，我地已經有聯絡傾下佢嘅狀況。當時佢最主要想買車，因為對車款同車嘅性能都唔熟，所以想我幫佢睇吓。隔離完之後我就開始去車行度睇車，除咗比較一啲大路嘅車牌子同款式之外，我建議佢去一啲有牌子嘅二手車行買一啲Approved Car，呢啲車除咗有原廠保養之外都比較有質素。因為呢面二手車嘅需求好大，同埋佢地比較想揸自動波同埋行汽油嘅車，變相揀得落手嘅車就好少，有時睇啱可能都已經俾人買咗。另外車行保險問題，揸住香港牌係唔可以試車，所以我都有幫佢試埋車。當然我仲做埋教車師傅同佢熟習下英國嘅道路同路牌。

除咗載佢去唔同嘅車行睇車之外，我都有陪佢去睇吓傢俬、買吓日用品同埋睇吓附近嘅環境，最主要都係想幫佢盡快熟悉呢度嘅環境。其實呢一個家庭對於移民生活都算係正面同埋積極嘅，只係生活上有啲細節唔係好清楚需要經驗嘅過來人幫手。當然後來我哋都溝通多咗，甚至做埋朋友，周不時都會同我地2家人都會聯誼下。

經營星月同行

星月同行配對運作就係就住星星（即將移民嘅香港人）嘅需求再幫佢配對月亮（在英港人），我哋會按着雙方嘅地區距離、職業甚至乎家庭背景去做一個配對務求令到大家有一個銜接點可以互相交流、互相照應。我哋作為管理員係幫佢哋配對完之後，就會有得佢哋自己聯絡、交流，當然我哋都好希望星月同月亮雙方最後可以成為朋友、擴大嚟英國嘅社交圈子，因為星月同行呢個計劃本來就係想透過幫助即將移民嘅香港人去凝聚嚟英國生活嘅香港人社群，加強香港人對香港文化、對民族嘅歸屬感。長遠來講我哋都希望可以搞下一啲聯誼活動甚至乎係團購去幫助一啲有需要嘅香港人。我哋仲係起步階段，咁所以都會想搵多啲在英港人去參與呢個活動可以幫助更多未來嚟嚟英國定居嘅香港人。

港僑會 轉介服務



為左令移民英國嘅香港人更容易適應同習慣英國嘅生活，港僑會亦都為各位提供專業服務轉介，以下係唔同範疇嘅轉介服務：

- 1.) 物業轉讓
- 2.) 移民法律
- 3.) 商業轉讓
- 4.) 財務及稅務意見
- 5.) 庇護法律
- 6.) 其他

免責聲明

港僑會會向服務提供者收取總費用中的一小部分作為介紹費，本筆費用將用作會務與慈善用途。

(*緊急人道需要如庇護律師轉介或其他法律援助不在此列。)

本會和服務提供者為互相獨立的機構，彼此並無利益關係。

請注意，您所留下的資訊將可能會被轉介至服務提供者。

另外港僑會亦都有心靈與生涯輔導嘅轉介服務，以下係港僑會提供嘅範疇：

(英國港僑協會不會在心靈及生涯輔導活動收取您任何費用。)

- 1.) 心理輔導
- 2.) 職業及教育輔導
- 3.) 信仰支援

需要更多資訊幫忙嘅香港人歡迎
瀏覽以下網頁：



專業服務



心靈與生涯輔導服務

CO-PRODUCERS

HONGKONGERS IN BRITAIN

CHRISTY HO

GRAPHIC DESIGN

CHRISTY HO


FEATURED ORGANISATIONS

HONG KONG LINK UP

HKG ONE

Special thanks to the interviewees
for their tips and stories behind
this migration journey.

We wish you all the best in Britain.



英國港僑協會
HONGKONGERS IN BRITAIN



星期同行

QUEENS ROAD S.W.19

同路人

BERGINE ART



GALLERY & PICTURE FRAMING

www.aubergineart.co.uk



TACCO

QUEENS RD SW19

你準備好移民未？

自從英國向香港人推出咗LOTR同埋BNO visa等移民政策，2021年陸續有唔少香港人選擇離開呢個載滿好多回憶嘅家。你，可能第一次踏足英國，可能係英國無依無靠，甚至可能對於呢個移民之旅覺得無比焦慮... 透過呢本刊你會發現到你絕對唔係孤獨一人，好多人都陪你走緊同一條路，各自為自己嘅未來、為香港人嘅文化努力承傳落去。幾位已經喺英國安定好嘅同路人就住佢哋移民嘅心路歷程，等各位即將要移民英國嘅香港人做借鑑，希望大家盡快適應到英國嘅生活。

喺英國生活唔難，但要有兩手準備，你又準備好未？

Leaving Hong Kong

2020 離開香港 2021

LEAVING
HOME HK

Leading to a new life

ON THE ROAD

去邊道

- | | |
|----------------|-------|
| 移民2個月：仔仔嘅將來 | P. 3 |
| 移民3個月：一個人移民 | P. 7 |
| 移民5個月：與貓移民 | P. 11 |
| 移民6個月：移民·不切實際？ | P. 15 |

訪 問 者： G P O 1
移 民 英 國 2 個 月

「我係一位教育工作者，我係一位爸爸，我要為我嘅小朋友著想行先!」

離開嘅原因

2019年因為社會運動已經有移問嘅說法，去到2020年後期有LOTR Visa嘅推出睇到開始有人走時，我就決定今年1月申請BNO visa4月正式移民。決定移民大概係三個月內嘅事，走得咁急係因為我仔仔就快兩歲，如果係香港下一年就會開始讀playgroup。眼見而家嘅教育制度每況愈下，仔仔亦未開始接受香港教育，咁不如直接係英國開始。另外就係怕再等嘅話移民門檻會更高，例如可能要打晒疫苗先走得。

仔仔嘅將來

仔仔係我嘅移民考慮之一。因為英國係五歲開始讀一年級，小朋友係五歲之前係可以選擇唔讀學前班日日咁屋企玩，我寧願同仔仔多啲活動，等佢嘅童年開心啲、少啲壓力。相反香港幼稚園嘅功課，根本就超出左小朋友嘅能力，好多都係喺家長幫手做，咁有意思咩？加上我自己都係教書嘅，睇到國安法殺到入學校，已經唔係講緊政治立場，而係歪曲緊歷史、顛倒是非黑白。而且最近有關學校自我審查、報國安嘅新聞，香港嘅教育已經唔係教育。睇老師嘅身份之前我係一位爸爸，我要為我嘅小朋友著想行先！如果我有能力走又係另一個說法，我諗我會嗰度同佢鬥長命。相反有日我嘅小朋友想走但走唔到，而佢知道當初我地選擇唔走，我係抹殺左佢嘅將來，個怨恨亦都會好大！而且我唔想佢去面對一個咁壞嘅前景。

同仔仔講移民

我哋都會想盡快將身份認同、移民呢啲話題早啲同仔仔傾，想佢知道我哋今日呢個決定背後嘅原因。我係好希望佢講廣東話，認同自己係香港人，但佢一路係英國成長但可能會對呢一個身份認同有疑問，所以我都擔心點樣去平衡同拿捏。

其實兩夫婦甚至同小朋友對移民都要傾得好清楚，要有定心理準備放棄嘅香港一直建立嘅嘢，如果唔係睇到英國同想像中有落差，只會有更大嘅磨擦、小朋友甚至會好反抗。

我朋友有個四歲大嘅小朋友，移民過程中有同小朋友溝通得太清楚，但嘅小朋友睇到英國有晒朋友，英文又講得唔好，慢慢由活潑開朗變到情緒好差，甚至唔肯返學。呢一個分離嘅感受唔係成人先有，小朋友對分離嘅感受嚟得更直接。

有日我嘅小朋友想走但走唔到，而佢知道當初我地選擇唔走，我係抹殺左佢嘅將來！

仔仔嘅將來

編輯：係你嚟到英國嘅時候，點解會揀咗Cardiff定居？

GP01: 第一其實係想避其他香港人，除左因為怕呢度嘅配套供不應求啲嘢會搶貴晒，另外就係始終人生路不熟，我會對其他人有防範。成個移民嘅經歷，我哋一家都身心疲累，未有更多嘅精力去同其他人互動。第二就係因為呢度樓價同物價比其他大城市低，以我呢家兩房825英磅，London月租可能係2000英磅，我哋嘅saving就相對地可以消耗得耐啲。當然呢度未必係我最後定居嘅地方，我只係想嗰度申請晒嘅文件，等仔仔大個少少要搵學校嘅時候，就會搵一區校網比較好嘅學校定居。坦白講，喺大家都呢個國家都唔熟悉嘅情況下，又點可能咁快就決定咗呢個城市過埋下半世？所以係解封之後，我都會抽時間去其他城市行吓感受吓，先再決定可以長居嘅地方。

編輯：可唔可以講下租屋嘅樓程？當中有冇咩需要注意？

GP01: 過程其實都唔容易，如果業主間屋做緊Mortgage，其中一個條款係要求租客有一份Full time、每個月有穩定嘅收入，即使你有一份part time或者你嘅收入冇文件證明，一般都唔會肯租俾你。如果以呢個推論去講，越來越多香港人睇未開工之前租到樓，已經全資擁有嘅樓亦都越嚟越少，變相好多啱啱嚟未有公開嘅人都未必搵到樓。當然買樓都要check吓當區嘅犯罪率、基建發展同埋背景。我曾經聽過英國某區嘅樓盤好平而且好多人俾個樓價吸引到去買，睇返先知原來嗰區以前係核電廠，附近仲有好多核廢料。我好彩只係係Airbnb住咗兩個星期就租到樓，當時因為lockdown關係係睇樓只可以睇網上agent upload嘅house tour，而我租緊嘅呢間屋一開頭未有片睇所以都有乜人有興趣，之後好好彩係片一upload左我就即刻同agent聯絡，但冒險嘅位就係因為lockdown冇得上門睇樓。後來一次過俾咗半年租金，業主亦都清楚我嘅Visa情況，就成功租到樓啦！

編輯：暫時你係英國有冇工作？呢邊搵工有冇tips?

GP01: 好多時呢邊搵工都好睇求職者嘅理念，以係Nando's打工或者做Sales為例：佢哋需要你交一篇自序講吓你可以點樣將自己嘅文化帶入公司式者係成功sell到客嘅成功經驗。我覺得係呢面做搵藍領嘅工作機會比較多同埋人工亦都比香港高。過嚟英國做老師要返負責嘅嘢嘅牌，但呢度通常只係有英文、數學、科學。以我本來做老師為例，我係香港教嘅科就鹹接唔到嚟英國，所以為咗生活都會搵吓需要體力勞動嘅工或者睇吓有冇學校需要TA / 代課嘅工，合作耐啲睇吓學校會唔會補貼教師課程然後我再發展。

編輯：嚟到英國有冇culture shock同埋唔習慣嘅時候？

GP01: 一開頭過到嚟都有乜煮中餐，同埋加上我哋可以消耗嘅錢唔多，所以基本上都有乜幫襯唐餐館因為都比較貴。但原來有啲嘢真係唔懂得，慳咗都只係壓抑緊你嘅情緒。有時我都煮下公仔麵加條腸加隻蛋，俾返少少香港茶記嘅味道。

編輯：你點樣睇香港人移民潮呢件事？


GP01: 其實係唔係逃走呢？係絕對係嘅！但係逃走唔等如身份認同冇咗。我就算睇呢度睇香港嘅新聞，我嘅情緒都仲係會受到牽動，始終我嘅親人同埋我嘅朋友都仲係香港。呢個始終唔係一個可以好快消化到嘅事，如果你係一個真真正正嘅香港人，呢一個陰影係一世嘍。相反一啲一啲過到嚟英國就唔記得呢個visa嘅原意喺度吃喝玩樂，但哋絕對唔係關心香港嘅一羣，只係以自己嘅利益行先。

移民有咩要準備呀？

最緊要係要計好條數，但哋有幾多錢可以喺度消耗，之後先至可以搵到一個適合佢哋住嘅地方。第二有好多文件要盡快申請好，例如車牌、NI. no.、銀行戶口，已申請以上呢啲文件最大嘅前提就係要搵到定居嘅地址，所以租到樓真係好重要！盡量唔好用Airbnb個地址用嚟申請以上嘅文件，因為如果你只係短期住喺嗰度，你一搬走再轉地址係一件好麻煩嘅事。

另外想將香港車牌轉英國車牌可能需要等至少10個星期。所以當你未有工作又未換到牌嘅時候想買車，好多時佢哋都唔接受分期付款，如果你住喺偏僻嘅地方，就要預返買車嘅經濟負擔。

最後就係過到嚟睇醫生要事先申請好地區GP，如果有長期病患嘅人記住去醫管局拎齊醫療紀錄，因為，GP唔係行入去就有得睇，要一早打電話同護士講病徵，醫生睇完先考慮俾你去診所見。輕嘅只會面診，之後自己去藥房配藥。所以最好有一版過嘅醫療紀錄同埋注意事項，scan 咗佢再email俾 GP，咁醫生有晒記錄就易跟好多！



INTERVIEW

訪問者：Dennis
移民英國3個月

一個人第一次踏足英國就係移民

移民嘅抉擇

我都係上年7月先諗移民，因為國安法同埋英國嘅BNO移民政策，我先真係實行呢個諗法。英國政府肯出呢一個政策，就係因為佢意識到香港可能將會有入道危機，有機會走嘅就好走啦。同埋香港政府係上年8月1號曾經出過出入境限制條例，我擔心再唔快啲過嚟，可能就有機會過到嚟。

移民嘅原因

首先因為香港嘅政治環境真係每況愈下，香港人本應有嘅自由冇咗，而香港嘅成功就係因為唔同方面都有自由，先吸引到外資入嚟成為國際金融中心。自從左國安法之後，好多外國嘅大企業都將佢嘅總部由香港搬咗去新加坡或者其他城市，咁即係變相香港嘅職位亦都會越來越少。個人因素嚟講我就唔係太鍾意香港嘅職場文化，好多人返工都係為咗層樓個個變晒做樓奴，啲價值觀就係如果你冇咗層樓就等於乜都冇。既然而家呢個地方已經冇晒前景可言，又有其他國家肯接收香港人，反正我哋香港裏面做緊嘅文員工作都比較基層，移民嘅成本又唔係好高，有機會咪試吓係第二個國家闖吓囉！作為一個一次嚟英國就係移民嘅人，啱啱嚟嘅時候我都有啲情緒，不過最重要都係要調節自己心態。雖然我自己一個嚟，但係我都會盡量去擴闊自己嘅圈子，例如我之前係Telegram群組入面識得其他去咗Edinburgh嘅香港人，我哋間唔中都會約出嚟見面、交流下，叫做大家有個照應。另外就係我都會做好多資料搜集去了解吓英國嘅資訊，最容易就係睇YouTuber移民英國嘅資訊。當然我都有follow港僑會嘅Telegram Channel，通常關於英國政府對BNO持有人嘅政策、英國集會嘅資訊都係係港僑會度睇返嚟，因為佢哋嘅資訊比較綜合，相對唔怪我搵資料嘅時間。

既然而家呢個地方已經冇晒前景可言，有機會咪試吓係第二個國家闖吓囉！

一個人移民

編輯：睇你嚟到英國嘅時候，點解會揀Edinburg定居？

Dennis: 我之前其實有諗過其他城市例如London, Manchester同埋Liverpool，因為都相對地係熱門嘅定居選擇，但係呢幾個地方都各自有我憂慮嘅地方。例如London作為首都我擔心生活成本相對地高；利物蒲嘅口音好重我怕語言搞唔掂會俾人歧視；曼城我做過research講過話嚟到治安唔好。所以綜合平衡返生活成本同埋治安等等嘅因素，最後都係揀左Edinburgh。我自己一個移民嚟，係英國亦都冇任何識嘅人，所以邊到落腳都分別不大。

編輯：可唔可以講下租屋嘅樓程？當中有冇咩需要注意？

Dennis: 都係靠嗰2個熱門App: Zoopla同RightMoov。當時都係揀定左我想落腳嘅城市，睇到啱嘅租盤，我就睇Google Map到睇租盤附近嘅環境同配套。因為我自己一個移民嚟，所以我係租劏房住，除咗間房係自己嘅之外，廚房廁所客廳都要同其他租客一齊共用。你依家住緊嘅一個單位係係香港搵嘅，當時我join左一個Telegram group，跟住有group友friend搭friend係到賣廣告放租所以我就聯絡咗業主喇。揀地方時要睇埋交通同埋同中心嘅距離，因為而家住緊嘅地方唔近市中心，所以後來我透過Zoopla同埋RightMoov搵咗另外一個市中心入面嘅租盤，價錢只係貴多少少，但係就慳返好多交通費。如果自己一個過嚟租劏房，要預左一次過要交半年至一年嘅租金。

編輯：暫時你係英國有冇工作？呢邊搵工有咩tips?


Dennis: 呢到政府部門做嘢好慢，申請NI. no.需要成16個星期，我4月頭申請可能要到8月尾先有變相其實我而家係好難搵工作，我亦都唔想搵一啲唔需要NI. no.嘅工作，但係亦都會擔心呢啲工作冇勞工保障。變相移民之前一定要預一筆資金係用嚟消耗。嚟到英國我都有話一定要做返以前差唔多嘅工種，我比較想搵一啲比較大嘅政府部門度做，例如Royal Mail、其他公務員職位，睇吓佢請唔請香港人。

編輯：嚟到英國有冇homesick?

Dennis: 思鄉嘅感覺就一定有嘍啦，由一個自細成長好熟悉嘅環境去到一個未嚟過嘅地方然後重新建立所有嘢其實唔易。會掛住香港嘅食物、風景、同埋一種講唔出嘅香港嘅感覺.....
有時我都會買出前一丁嚟食，叫做舒緩下Home sick。同埋我都經常自己煮飯嘅，因為自己一個住所有嘢但求簡單就夠。只要有飯然後再可以煎下雞翼、腸仔或者午餐肉咁就一餐嚟啦。



Dennis: 因為我好鍾意食飯，所以我特別嚟香港帶咗部手提蒸飯機嚟英國。佢嘅特別之處就係因為佢有兩層，下格可以用嚟煲飯然後上格可以蒸熟餛飩或者點心都得，有時懶得落鑊煮餛飩我就將所有嘢擺去蒸，例如茄汁豆、香腸。因為嚟香港我慣咗食飯，我覺得唔食飯係唔夠飽肚，喺呢度我每日至少有一餐都係要食飯嘅。



INTERVIEW

訪問者：Rick
移民英國5個月

「我同太太係從來冇嚟過英國，完全唔熟悉呢個國家同埋文化。」

出外靠朋友

其實成個移民經歷都幾麻煩，因為之前政府禁止英國直航返嚟香港，令我哋訂咗機票都被取消，前前後後我哋總共買咗四次機票。最後我同我太太要分開買唔同航空公司嘅機票飛過嚟，前後隔咗10日。

因為機票延遲問題亦都令我哋嘅行程更加亂同複雜，心情難免都有影響。其中一個不愉快嘅小插曲就係關於Airbnb...本來我哋已經睇Airbnb租好左成間屋住一個月先再慢慢搵樓，後來因為機票延遲問題我哋同房東講時先發現原來佢將其中一間房租咗出去，呢個同我哋原本嘅計劃係有嚴重出入，所以我哋決定退租，而退款又攞左一排攞得返。

呢件事令我哋唯有盡快嚟香港上網搵英國嘅租盤，因為我地個陣以LOTR身份入境係做唔到地產公司要求我哋做嘅credit check，令我地租屋嘅過程更加難。後來有朋友介紹左一個係英國嘅香港agent，agent除左幫我哋同業主解釋我哋嘅情況，仲詳細影左好多租盤嘅相同埋附近嘅配套。因為時間都好急，我哋睇過都滿意後就一次過電匯左一年嘅租金俾業主，最後就成功租到樓。

成個移民我哋都得到唔少朋友嘅幫助。記得我太太早我10日到英國，嗰陣仲係冬天，嚟到嘅第三日發現屋企嘅熱水爐壞咗令我哋成間屋冇暖氣亦都冇熱水，同埋啲家當仲未運到嚟。好彩有個朋友係London借咗啲被俾佢，先至勉強捱到有熱水嘅三日。當然因為太太要自我隔離10日，嗰度冇太多日用品，除咗有時朋友幫手接濟下，我哋時唯有睇網上買嘢再寄去英國俾佢用。

遙距之Work from home

我哋香港係做IT嘅，公司知道咗我會嚟呢。

因為時差問題，我哋英國返工嘅時間係由朝早5:30到晏晝1:00，除咗寫program之外就要就返香港佢哋開會嘅時間。基本上呢度遙距工作同嚟香港Work from Home都差唔多，所以都唔會有太大嘅問題。即將公司就可能會有新嘅安排，如果可以繼續呢個工作模式我哋唔介意，另一邊廂我哋都會開始嚟英國搵工。

因為暫時未有NI. no.，如果有工開都會考慮做住part time先，好似我琴日先啱咗interview做外賣速遞，其實最緊要係可以同呢度嘅生活接軌，當然一有NI. no.時，我會繼續搵返IT嘅工作，始終IT嘅工作性質邊度都係一樣，我哋度都唔會特別難適應。

香港人唔好棄養啊！
你過得嚟移民點可以留低你嘅親人！

與貓移民

貓貓移民手續篇

本來我哋諗住七月或者八月先至飛過嚟，但後來發現每一架機嘅貨運格只係得大概5個寵物位，而每星期得2-3班機，要帶埋寵物去移民要早啲準備同埋最好搵Agent幫手搞！我哋搵咗一間有旅行社牌照嘅agency幫我哋搞貓貓移民，最主要係想佢幫我哋處理好所有文件同埋幫我哋嘅貓貓留到機位。之後我地就去漁農署幫貓貓打針同埋植入晶片去符合英國嘅寵物移民條件，最後Agent會提供埋貓貓飛機上用嘅籠。呢個服務大概係一隻貓 / hk\$13,000，而運送貓貓嘅價錢會取決於貓貓同籠加埋嘅重量同埋體積。因為我有兩隻貓，而佢地可以坐喺同一個籠度，個價錢大概係hk\$18,000左右。留到機位係好重要嘅一件事，因為坊間有人親自email航空公司都有回覆，而搵agent好嘅地方係佢哋自己有聯絡航空公司嘅方法，留到機位嘅機會率比自己親自去搵大好多。當然搵agent都要小心啲，要好清楚佢哋俾咗咩服務你，有好多agent係可以處理文件但未必留到機位。




唔係因為見到希望先至堅持，
而係要堅持先有希望！

Home Sick?

好多人會話呢個嘅歧視問題好嚴重，我未黎之前都會擔心自己英文講得唔好會俾人白眼。但我嚟到之後反而覺得佢哋知道我哋英文唔係第一語言會更加有耐性去聽。當然我都覺得大家唔好過分理想化移民英國呢件事，如果你係追求一個比較自由嘅社會呢度係有嘅，嚟到呢面生活成本高亦都係真嘅，要好好計好條數同埋理清自己嘅移民目的。我覺得比起home sick，帶俾我更深度感受係係呢度睇住香港嘅社會狀況一日比一日差，由初選47人俾人拉咗去到蘋果日報結業，睇到呢啲新聞令我哋嘅情緒好低落，除咗係接收香港嘅資訊因為有時差而造成嘅距離感；同埋就係幫唔到香港嘅無力感，睇住一個我成長嘅地方變得更加令我好難受。我好認同一句「唔係因為見到希望先至堅持，而係要堅持先有希望」，我希望大家嚟到英國唔好唔記得離開香港嘅原因、放棄香港文化嘅精神同埋香港人嘅身份認同。傳承係好重要，有下一代嘅話我一定同佢哋講我哋移民英國嘅背景同埋香港嘅文化，尤其是係我哋嘅語言——廣東話同埋我哋呢幾年經歷嘅社會運動，係代表住我哋嘅文化、歷史。



世上沒有從天而降的英雄，
只有挺身而出的凡人！




特別嘅家當

我帶咗好多關於香港社運嘅書過嚟英國，帶過嚟係因為我怕之後買唔返同埋都想比我嘅下一代去了解香港，例如中大出嘅〈香港民族論〉，我怕之後冇得買。另外就係光時嘅旗，始終帶俾我好多2019年社會運動嘅回憶，亦都因為呢句口號貫穿左普遍香港人由2019年到今日嘅訴求。帶左枝旗過嚟就係時時刻刻提醒返自己作為香港人過到嚟可以點樣傳承到香港嘅文化、貢獻返呢個民族。

呢個模型係我一個朋友送俾我嘅，我放咗書枱上面。卓洛係我一個好喜歡嘅角色，但即使冇主角天生嘅能力，但後天努力令佢都可以睇海賊王世界入面佔一席位。我覺得同抗爭時期口號：「世上沒有從天而降的英雄，只有挺身而出的凡人」有異曲同工之妙。即使去咗外地，大家各自努力，挺身而出，總會收到意想不到嘅結果。而〈暴政〉一書，亦係我感到心煩或迷失時，給予我指引，令我可以整理好思緒繼續前行。

移民呢件事

對我嚟講移民係一定嘍啦，而掙扎嘅位係點樣可以梳理思緒...睇住呢個地方一路變差而自己唔到啲咩。好多時我會睇到網上嘅討論區會有唔同嘅聲音嚟自移左民嘅人同埋選擇留低嘅人，選擇留嘅人可能會話離開咗嘅係懦夫，相反移民咗嘅又會話明白留嚟嘅人做乜，形成咗一個對立嘅局面。我覺得應該要尊重唔同人嘅價值觀同埋決定，我唔會話留嚟嘅人就一定係蠢，但係佢哋要有心理準備迎接更差嘅狀況，要堅持自己嘅信念；相反離開咗嘅人我又唔覺得佢哋係放棄咗香港，都唔好講話打唔打國際線，傳承到呢個文化就已經行咗一大步。其實盡自己嘅所能話俾身邊嘅人知香港嘅民族、發生過嘅事，可以喺度參加集會嘅就集會，提高曝光率自然就會做到文宣嘅效果。每個人都要謹守自己嘅崗位，過到嚟千祈唔好覺得自己咩都做唔到，因為你絕對可以比嚟香港做得嘅更多。



訪問者：阿寶
移民英國6個月

「我地從來都有嚟過英國，而第一次去就係要過尼建立新生活，當中都有好多忐忑不安嘅時候。」

離開嘅原因

自香港陸續發生嘅社會運動開始，大大小小嘅新聞報導長期令我嘅情緒好低落，加上自己份工嘅工作壓力都好大，令到自己心理壓力好大，經常失眠。當然有頒布國安法之後，就再加強咗我嘅移民決心。我好相信歷史係用緊唔同嘅方式演繹緊差唔多嘅事情，所以我都覺得香港呢個社會只會一路向下沉。

我同我老公籌備過嚟英國時間大概係半年左右，本來我係諗住大概二三月先用BNO Visa移民過嚟英國，但係睇住每日嘅新聞見到呢個咁荒謬嘅社會，我嘅心理狀況非常崩潰。同時又怕之後BNO visa移民嘅門檻會有轉變甚至越尼越高；再加上當時2020年12月時因為lockdown關係英國冇飛機嚟香港，我好驚香港隨時冇飛機去英國所以我就即刻畀LOTR截止前即刻申請過嚟英國。

走前一個月

我每日都好大壓力，心情好崩潰每日都瞓唔着咁滯。因為我好怕過到嚟搵唔到工同樓，同埋因為我同老公畀移民之前都有話好多儲蓄畀手，所以到步後我哋需要知慳儉同埋要盡快搵到工去幫補下。再加上因為我地從來都有嚟過英國，而第一次去就係要過尼建立新生活，當中都有好多忐忑不安嘅時候。

同埋身邊嘅人其實都唔係好支持，我同我老公只係基層生活嘅人，唔係社會上認可嘅有錢人，其他人就會覺得帶住咁少錢去移民，又未必搵到工、搵到樓係一個不切實際嘅決定。但我認為只要做足research，知道唔同地區嘅物價同埋租金有好多地方可以慳到唔少錢。

我覺得選擇走或者留低都有話一定錯定啱，每個人嘅價值觀同埋需求都唔同。

移民，不切實際？

準備

我同老公係畀LOTR申請截止日期（一月尾）就過到嚟英國諗住2月1號嘅時候可以即刻申請BNO Visa。時當中好多資訊都係嚟自YouTube同埋KOL嘅分享。我其實都follow咗好多唔同嘅YouTuber，對於同一個範疇嘅資訊我會睇晒唔同人嘅資料同埋分析再整合一套可以幫到自己嘅資料，所以畀做資料蒐集嘅時候我就已經知道好多移民英國應該要注意嘅事項。

編輯：睇你嚟到英國嘅時候，點解會揀Surrey定居？

阿寶：當初我係想搵London西南面嘅地區去定居，例如：Richmond, Kingston或者Sutton。我係用RightMoov同埋Zoopla嘅APP去搵樓。搵樓嘅過程，我會特別留意啲區嘅治安，同埋自己預咗嘅Budget。最後揀咗Surrey係因為London嘅樓價實在太貴，而Surrey樓價比較平去London亦都算快，所以最後揀咗嗰度定居。

編輯：可唔可以講下租屋嘅樓程？當中有冇咩需要注意？

阿寶：租屋流程大概都係畀APP入面搵到心儀嘅樓盤再留低email同埋電話俾agent, agent再同我約時間上門睇樓。當時第一次上門睇完租盤我哋好快就租咗一間一房單位。咁快拍板係因為聽Agent講有租客就算肯比12個月嘅租金，業主都有機會因為你有固定收入或者其他文件證明而拒絕租樓。當中Agent都會問返租客嘅Visa情況，當時我係用咗港僑會出嘅一篇Email template去應付好多需要我解釋自身狀況嘅機構。（註：Template係主要幫助以LOTR Visa申請入嚟嘅香港人向銀行或者Agent解釋visa狀況）我而家租緊嘅地方對比起London嘅樓價係相對地低，一個一房單位大概950英鎊一個月，而Kingston或者Sutton差唔多嘅租盤都需要1000至1200英鎊一個月。

編輯：暫時你畀英國有冇工作？大概搵咗幾耐工先正式返工？

阿寶：我同老公都係大概嚟咗四個月先真係搵到工。機緣巧合下我係附近搵到一個香港人為主嘅教會，入面有一位教友想請一個看護，即使唔係做返本行，我都好快就應徵咗。

而我老公係做工程，呢度似乎做工程幾吃香。睇Indeed遞咗幾份cv後，每日就都有Agent搵返返工，而通常都唔需要面試或者即時需要提供NI. no.，佢地剩係想知求職人合唔合法工作同冇冇車牌，之後交代時間、地點就可以去地盤返工。

編輯：你覺得英國同香港嘅生活有咩分別？

阿寶：嚟香港份工差唔多日日都OT到10 / 11點先返到屋企，基本上放工一返到屋企沖完涼就訓覺，完全冇私人時間，當時我嘅工作壓力係好大！呢啲到我放咗工都仲有時間可以煮吓飯、睇吓電視放鬆下個人先去完結嘅一日，呢到絕對可以稱為work life balance！同埋嚟到先發覺，嚟香港我哋都太着重物質主義，大家都好慣常去用人工去做一個指標嚟判斷個人成唔成功、好重視自己有幾多錢，好似除咗錢以外其他嘢都無意義。而呢度好多人人都好敬業樂業，所有工種大家都好尊重。不過我都認為一個地方都有佢好或者唔好嘅地方，好視乎你係人生活着嘅地方嘅邊度。



編輯：移咗民一段時間你有冇homesick?
係英國有冇識到其他香港人？

阿寶：為咗可以食到香港嘅味道，我都經常係屋企煮家常便飯。如果想煮香港嘅餸菜，我通常都會係網上訂購唔同嘅中式或者港式嘅調味料、食物。尤其是香港人開嘅華南行，我都可以係網上買餸，等佢哋再送嚟我屋企。如果有車嘅話，我都曾想去位於Croydon嘅樂業行買餸。

另外就係我住緊嘅呢個區都好香港人，好容易就會識到好多唔同嘅香港人，大家都好互相幫助大家。以最近為例，我因為係教會識咗一個香港媽媽，佢湊小朋友返學放學嘅時候係學校識到唔少香港家長。佢哋有一個WhatsApp群組經常會搞吓唔同嘅親子聯誼活動。最近我就同佢哋成個群組嘅家庭一齊去咗野餐，互相交流吓係英國生活嘅心得。

係呢度嘅香港群組其實都幫到啱啱嘅香港人好多，我聽過有一個香港人佢喺度買咗層樓，再用一個合理嘅價錢轉租俾返自己香港人。因為好似我哋呢區Sutton或者Kingston一家大細嚟要租一個三房單位租盤好搶手，要搵到合適嘅租盤係比較難，有時甚至要鬥開價高先租到。

另外，為咗令英國嘅生活有香港家嘅感覺，我都係香港帶咗唔少嘢過嚟去英國。例如電飯煲、按摩椅，唯一有少少後悔係有帶到香港嘅豬肉刀，因為有時喺度煲湯要斬豬骨嘅時候，外國嘅刀都係有咁好用嘅。

編輯：你點樣睇香港人移民潮呢件事？

阿寶：我覺得選擇走或者留低都有話一定錯定咁，每個人嘅價值觀同埋需求都唔同。係香港嘅生活壓力實在太大，社會嘅前景好似越嚟越唔明朗，我心理上嘅負擔都越嚟越重，所以我選擇離開，而我過咗嚟裏面確實成個人係放鬆咗好多、開朗咗好多。同埋係香港好似好難做到幫助社會嘅事，而係英國感覺上我可以更安心去更主動去推動更多人去關心香港。相反留係香港選擇繼續推動本土文化、香港人身份認同價值嘅人，佢哋選擇留低係一個土生土長嘅地方都唔係一件壞嘅事，我哋需要睇大家嘅價值觀重點係邊度。



阿寶係英國嘅理財之道


請預備一筆過到嚟消耗嘅錢：

係未真正搵到定居嘅地方之前，我哋係住係Servicing apartment，原因係有廚房方便我哋自己煮嘢食解決一日三餐，比起叫外賣或者出去食係慳咗唔少。當然大家都可以搵Airbnb，同業主住嘅Airbnb會更平，大概1000英磅。一個月嘅租金都會相對地比住係Servicing apartment平，我哋有揀Airbnb嘅原因係因為聽過唔少住客同業主同住嘅時候會發生唔少摩擦，為咗避免咁多麻煩，我哋最後都係揀咗住Service apartment。不過大家最好都預住多幾個星期，除咗預返隔離嘅10日，同埋方便自己有足夠嘅時間搵樓。

其實最要預留嘅資金係一開頭要俾12個月嘅租金，之後先係生活嘅開支。生活嘅開支其實可以係好多範疇去減低成本，因為係英國自己煮飯真係可以慳到好多錢，變相我哋嘅生活成本都去曬買餸嘅錢到。例如超市我會選擇去價錢比較平嘅Asda同埋Lidl，因為Lockdown所以佢哋都提供送貨，咁樣除咗買餸嘅錢之外我仲可以慳埋搭車嘅車費。

另外我都都會用唔少cash back嘅網站，係買嘢嘅時候順便拎到唔少現金回贈。例如我會用到Quidco、Topcashback、Completesaving呢D網站入面嘅Link去買傢俬或者搵水電煤都可以有現金回贈。

香港人，英國見！



聲

BYE - BYE

遠
去
這
都
市

Queen's Road East

103-119 皇后大道東 117-67

郵箱廣告

一幻